

四庫全書

史部

欽定四庫全書

景定建康志卷四十三

宋 周應合 撰

風土志二

古陵

古越王塚在句容縣

考證王名翳周安王時薨葬句容大橫山下

吳大帝陵在蔣山之陽去城一十五里

考證吳志神鳳元年大帝崩葬蔣陵 窠宇記在縣

東北蔣山八里 丹陽記云蔣陵因山為名 輿地

志云九日臺當孫陵曲折之傍故名蔣陵亭 今蔣

廟西有孫陵岡蔣陵地也

何遜經孫氏陵詩在昔零陵厭神罷若無依逐兔爭

先捷倚廉競因機呼吸開霸道叱咤掩江畿豹變分奇略虎視肅戎威長蛇鉞已漢冀馬絕淮淝交戟無內禦重門豈外扉成功終已棄山德懷而違水龍忽東驚青蓋乃西歸竭來易永久年代暖湮微苔石疑文字荆墳失是非山鷺空曙響隴月自秋輝銀海終無浪金鳬永不飛間閭今如此望望沾人衣

步夫人陵在蔣陵

考證吳志赤烏元年追拜夫人步氏為皇后後合葬

蔣陵 今蔣廟西南有孫陵岡上有步夫人墩墩之側有夫人塚乃其地也

宣明太子墳亦在蔣陵

考證吳志大帝皇太子登初葬句容後三年移葬鍾山西蔣陵

晉康帝陵

晉簡文帝陵

晉孝武帝陵

晉安帝陵

晉恭帝陵

考證寔錄康帝建元三年葬崇平陵簡文帝咸安二年葬高平陵孝武帝太元二十一年葬隆平陵安帝義熙十四年崩明年葬休平陵恭帝元熙二年葬冲平陵五陵並在鍾山之陽皆不起墳

晉元帝陵

晉明帝陵

晉成帝陵

晉哀帝陵

考證寔錄元帝永昌元年春葬建平陵明帝太寧三年葬武平陵成帝成康八年葬興平陵哀帝興寧三

年葬安平陵四陵並在雞籠山之陽皆不起墳

晉穆帝陵在幕府山前近西里俗相傳穆天子墳即其地也

考證寔錄穆帝升平五年葬永平陵在幕府山

宋武帝陵在縣東北二十里

考證寔錄宋高祖永初三年葬初寧陵隸建康縣蔣山政和間有人于蔣廟側得一石柱題云初寧陵西北隅以此考之其墳去蔣廟不遠

宋文帝陵在縣東北二十五里與武帝陵相近

考證文帝元嘉二十年葬長寧陵

袁后陵即文帝后合葬長寧陵

考證南史元嘉十七年葬先皇后袁氏于長寧陵長

寧即文帝陵也

宋明宣沈太后陵在今寶林寺西南有墳壠相傳為國

婆墳疑即沈后所葬之地

舊志

考證南史宋明宣沈太后為文帝美人生明帝元嘉

三十年葬建康之幕府山

宋明帝陵在幕府山西與王導墳相近今山前有墳壠  
晉穆帝陵在山南或以西為明帝之墓

考證明帝恭懷元年葬高寧陵隸臨沂縣

齊明欽皇后陵在今淳化鎮之北

考證南史齊明欽劉皇后永明七年葬江乘縣張山  
梁昭明陵在城東北四十五里賈山前與齊文惠太子  
同處排陵並葬



蕭墓岡西去縣三十五里或云蕭梁帝陵寢未詳

陳高祖陵在上元縣東崇禮鄉地名陵里有曰天子林其地有石麒麟二里俗相傳即陳高祖墓也去城二十五里

考證陳高祖永定三年葬萬安陵隸城東南古彭城驛側

陳文帝陵在縣東北陵山之南今鴈門山之北

考證陳文帝天康元年葬永寧陵

諸墓

左伯桃墓羊角哀墓並在漂水縣南四十五里儀鳳鄉  
孔鎮南大驛路西

考證烈士傳云左伯桃羊角哀燕人也二人為友聞  
楚王待士乃同入楚至梁山值雨雪糧少伯桃乃併  
糧與哀令往事楚自餓死于空樹中哀至楚為上大  
夫乃告楚王備禮葬于此一夕哀夢伯桃告之曰幸  
感子葬我奈何與荊將軍墓相鄰每與吾戰為之困

迫今年九月十五日將大戰以決勝負幸假我兵馬  
叫噪塚上以相助哀覺而悲之如期而往歎曰今在  
塚上安知我友之勝負乃開棺自刎而死就葬伯桃  
墓中劉孝標廣絕交云續羊左之徽烈正謂是也唐  
大曆六年顏真卿過墓下作詩弔之此詩書于蒲塘  
客館大中十一  
年宣歙池觀察使鄭薰徙魯公墨蹟置宣州之北望樓作文以記之詩今亡熙寧中太子  
中允關杞知縣事夢二人告之曰余羊左也為魏倫  
所告出祭文百餘篇示杞既覺僅能記其一語云千

花落兮奠酒空明日問之邑人有魏倫者以錢買羊

左墓木將伐焉杞遽止之乃表墓事見胡宗愈詩

云詩

古有二烈士羊左與桃結交事遊學心若膠漆牢  
遠聞楚王賢侍士皆英髦負笈首燕路不憚千里勞  
行行及梁山雨雪填巖峻途窮食不繼餓口空哲啓  
無為俱死溺原野徒身膏我留子獨往命各繫所遭  
慷慨示一訣併糧解衣袍僵坐空穴中視死輕鴻毛  
角哀既仕楚爵位顯執羔顧懷交舊心血泣聲號咷  
王間義其事禮葬蓮蒿孤風激頽俗千古清蕭颯  
叔世忠義喪友道皆滔湎平居論莫逆握手相遊遨  
利害一軋已所得無秋毫擠壑又下石反若豺狼嗥  
秦末餘耳輩遇時方驛騷誓為刎頸交名節初相高  
一旦成毗睚親勒兵相鏖斬餘泚水上論功傳子教  
較此豈不愧清議安能逃凜凜凜凜水傍危墳望江華

蔚宗宰茲邑夢睹斯人曹衣冠甚奇古晤語開鬱陶  
持示古祭文百本皆旌褒其間記一二花落空奠醪  
薄訴魏倫者相侵意貪饕詰朝究其詳倫果邑之豪  
墓木合數抱私欲揮斧刀移丈禁採伐表識嚴芟薶  
英靈儼如舊雖久不聞韶哀我今之人五交戒所操  
樞密將之奇詩結交有羊左是惟一時才為聞楚  
王賢廟然自燕來一旦食欲盡俱往空雙埋伯桃乃  
獨留餞死梁山隈角哀仕既達感舊肝膽摧念此併  
糧惠告還葬遺骸至今漂水旁突兀穴風雷堆何人致  
薦奠千花飛酒杯精靈今在否古木生風雷堆何人致  
過之駐車久徘徊感歎篇詠灑翰鏤瓊瑰惜哉今  
不存散落隨塵埃空餘鄭薰記片石昏蒼苔末世友  
道絕雅歌堪式顏草木尚萎死小怨何足懷我思有  
所矯巨觥明寒灰茲事雖過中義烈亦壯哉幸逢太  
丘長揭表旌泉臺寥寥千載間下激清風迴還顧勢  
利交市道良可哀邑宰周邵跋此詩刻石廟中元

祐中知縣周邦彥詩古交久淪喪末世充反覆谷風  
歌焚輪黃鳥譬伐木永懷羊與左重義踰血屬客行  
干楚王冬雪無斗粟傾糧活一士誓不俱死辱風雲  
為慘變鳥獸同躑躅角哀哭前途伯桃槁空谷終乘  
大夫車十騎下棺櫨子長何所疑舊史刊不錄獨行  
貴苟難義俠輕殺戮雖云匪中制要可興薄俗荒墳  
鄰萬鬼溘死皆碌碌何事荊將軍搃戈相窘逐史  
吏部彌鞏宰漂水日有詩詞云餘耳當年刎頸交所  
爭利害僅毫毛一朝泯水相屠戮豈識羊哀左伯桃  
交情切戒勤終墮以義存心心必果死生可托永無  
睽自古中山說羊左羊左合人我左既遜糧甘自餓  
羊仕楚王官職大佑舊殺身蓬顓顓公疇昔曾經過  
佳詠至今傳播書此為諸墓先又加詳焉非語怪也將以厲  
薄俗也

西漢甄邯墓在後湖之側

考證南史宋張永嘗開玄武湖過古塚塚上得一銅斗有柄文帝以訪朝士著作郎何承天曰此亡新戚斗王莽時三公亡皆賜之一在塚外一在塚內時三台居江左者惟甄邯為大司徒必邯之墓及啓塚內更得一斗復有一石銘云大司徒甄邯之墓

後漢史君崇墓在溧陽縣北三十里

考證崇為司空驃騎將軍青冀二州刺史贈溧陽侯

使持節徐兗二州刺史有神道碑在墓所晉永和八年立唐貞觀十四年十八代孫越王府東閣祭酒常州長史仲謨題云隋末大亂避地閩越碑壞再立其頌曰山嶽降精川瀆耀靈倚歟史氏世濟其英忠言允塞嘉猷有聲從容變理散誕飛纓含香青瑣敷奏丹庭有犯無隱唯言是聽王室斯賴諸侯以寧內侍帷幄外典專城為政以德察獄以情化俗草偃溪谷風清金相玉質不墮厥名處溢不驕居勞不憚視險



如夷忘身逐叛駒頌美魯青蒲安漢執簡書愆姦邪  
逃竄匪君之忠孰能戡亂在昔隆漢姻婭皇家唯帝  
念功爵命屢加三台五鼎駙馬奉車腰佩兩印綬帶  
雙緹何彼穠矣常棣之華如珪不玷似玉無瑕節之  
以禮儉而不奢篤生我侯英略備舉有藝有才能文  
能武孝以奉親忠惟衛主亦眉始結白波猶侮執銳  
被堅斬馘滅虜截彼長蛇殲斯猾豎策賞廟堂書勲  
王府功成弗居名立不取簡在帝心酬封祚土厥土

惟何在漂之許初食三千卒封萬戶葭莢揭揭麀鹿  
麀麀禾役旆旆原田撫撫俯營川陸魚鹽所聚蝗飛  
火滅還珠去虎子民輯悅建茲城宇大厦耽耽聽政  
之所祠堂石殿坐靈攸處

闕字

春秋兮祭祀不阻

漂陽侯陶謙墓在漂陽縣

考證後漢書獻帝興平元年漂陽侯陶謙卒且葬張  
昭哀之其詞曰猗歟使君君侯將軍膺秉懿德允武  
允文體足剛直守以溫仁令舒及廬遺愛于民牧幽

暨徐甘棠是均憬憬夷貊賴侯以清蠢蠢妖寇匪侯  
不寧唯帝念績爵命以章既牧且侯啓土漂陽遂并  
上將受號安東將平世難社稷是崇降年不永奄忽  
殂薨喪復失恃民知困窮曾不旬日五郡潰崩哀我  
人斯將誰仰憑追思靡及仰叫皇穹嗚呼哀哉觀張  
公辭意則陶侯之賢可想矣

吳丞相萬彧墓在漂陽縣南五十里惠德鄉銀方山下  
考證吳志孫皓寶鼎元年彧為右丞相鳳凰元年被

譴憂死

吳甘寧墓在直瀆山下

考證伏涵記吳將甘寧墓在直瀆之下俗云墓有王氣孫皓惡之鑿其後為直瀆

僊翁葛玄墓吳太極左僊翁葛玄墓在句容縣西南一里郡國志云句曲有葛玄家

諸葛恪墓舊府志及句容縣志皆言在句容縣石子崗今考恪墓實在城西南

考證恪仕吳累官至州牧為孫峻所殺葬石子崗先是童謠曰諸葛恪蘆葦單衣箴鉤落于何相求成子閣成子閣者反語石子崗也建業西南有長陵名石子崗今清涼寺側亦有石子崗峻殺恪處非句容也詳見石子崗下

晉山簡墓在樂遊苑內

舊志

考證晉永嘉六年征南將軍荊州刺史山簡卒歸葬建康真武湖南覆舟山之陰

溫嶠墓初葬豫章朝廷追思之乃為造大墓遷葬元明陵北幕府山之陽

考證按晉書嶠拜驃騎將軍開府儀同三司散騎常侍封始安郡公初葬豫章後朝廷追嶠勲德將為造大墓于元明二帝陵之北陶侃上表願停移葬詔從之其後嶠妻何氏卒子放之便載喪還詔葬建平陵北即是嶠妻何氏墓非嶠墓也

郭璞墓真武湖中有大墩里俗相傳曰郭璞墓

考證按晉書王敦加荊州牧敦將舉兵使璞筮璞曰  
無成敦怒收璞斬之時在武昌或歸葬于此未可知  
也世傳璞墓非一恐未可執此為是

卞壺墓在冶城

考證晉蘇峻之亂尚書令右將軍卞公壺力疾率厲  
散眾及左右更數百攻賊苦戰死之二子盱眙見父  
沒相隨赴賊同時見害並葬冶城義熙間盜發壺墓  
尸僵鬚髮蒼白面如生兩手悉拳爪甲穿達手背安

帝詔給錢十萬以修塋兆齊梁續加修治

齊任彥升代綏建太

守卞彬謝修墓啓云臣彬啓伏見詔書并鄭義泰定  
勅當賜修理臣高祖晉故驃騎大將軍建興忠貞公  
壺墳塋臣門緒不昌天道所昧忠邁身危孝積家禍  
名教同悲隱淪惆悵而年世貿遷孤裔淪塞遂使碑  
表蕪滅丘樹荒毀狐兔成穴重收蜀歌感慨自哀日  
月纏邁陛下弘宣教義非求効于方今壺餘烈不  
泯固陳力于異世但加等之渥近闕于晉典樵採之  
禁遠流于皇代臣亦何人敢謝斯幸不任悲荷之至  
南唐于墓所建忠貞亭穿地得斷碑徐鉉為之識

宋朝慶厯三年葉公清臣改忠孝亭元祐八年曾公  
肇為堂繪壺像其中列諸祀典為之記建炎兵革碑



燬不存史公正志取曾公記重刻石

記云江寧府城天慶觀吳治城

地也有晉卞忠貞公墓在焉按公諱壺官至尚書令右將軍蘇峻之難與其二子力戰死之謚忠貞葬治城後七十餘年盜發公墓尸偃如生髻髮蒼然爪甲穿達手背安帝賜錢十萬封之梁人復毀武帝又加修治李氏有江南建忠貞亭于其墓比穿地得斷碑公名存焉徐公鍇實為之記本朝慶厯中知府事龍圖閣直學士葉公清臣又封墓刻石表之改亭名曰忠孝後五十年余來守是邦即亭為堂圖公像其中列之祀典春秋祠焉或曰將軍死綏職也自古仗節死難之臣衆矣何獨祠公哉余曰不然晉自渡江崎嶇百年王敦蘇峻桓溫父子相繼稱兵內侮其弱甚矣敦峻之亂自劉隗刁協庾亮啟之然冠至輒適王導亦避峻出奔數人皆執政大臣或元舅故老一時之望而倉卒之際委主于賊苟求自全況其下者哉

此無它自西晉以來清談勝而節義廢故學士大夫  
不以苟免為恥公于是時獨能見危授命破家為國  
其過人遠甚矧公剛烈鯁直見于平生王導貴重雖  
天子猶卑下之而公數攻其失可謂柔不茹剛不吐  
者矣至于當官幹寔以矯革放誕敦崇名檢為任其  
志豈苟阿時好以取容流俗者哉及亮之召峻舉朝  
知其不可而莫敢正言公獨固爭不從卒蹈其禍蓋  
其始終大節如此異乎匹夫之勇効死于一旦者矣  
雖更萬世聞其風者猶將感激奮厲想見其為人况  
神靈所依拱木猶在祠之所以慰忠魂于地下興節  
義于壤俗豈苟然哉在禮以死勤事則祀之歷代之  
制賢臣之墓芻牧有禁維公所立寔應二法况夫遠  
論隨會見思九原近稽巡遠血食雙廟則公之廟祀  
夫何歎哉堂成賓屬曰願有識余不得辭迺併著所  
以祠公之意使來者有考云左朝請大夫充甯文閣  
侍制知江寧軍府事曹啓記曲阜文昭公以元祐八

年自彭城鎮建業明年移河間經建炎兵火記刻久  
失之見于廟壁後七十有六年得番陽章甫隸而移  
之石乾道四年三月壬申右朝散郎直祕閣江南東  
路轉運判官韓元吉題左朝散郎直顯謨閣權發遣  
江南東路計度轉運副使公事兼本路勸農使趙彥  
端左朝請郎尚書戶部員外郎總領淮西軍馬錢糧  
專一報發御前軍馬文字葉衡左朝奉郎充集英殿  
修撰知建康軍府事充江南東路安撫使馬步軍都  
總管兼行宮留守司公事兼沿江嘉定四年黃公度建  
江水軍制置使史正志立石

忠孝堂治城樓于墓側

馬公之純詩當時風俗尚清  
談笑道公心瓦石含臨難此

曹皆處女惟公一箇是奇男一門忠孝真難得六代  
衣冠孰與參墓草沒頭人不見令人惆悵極無堪  
南川曾極詩握節顏公拳透爪歸元先軫面如生晉  
陵發掘今無主獨有忠魂占冶城錢汝元詩哀哉

戰死國門邊忠孝千年獨兩全蓋有完軀保妻子謾  
談秦凱說廉捐北谷羅愚詩卽義之風古所褒清  
談于晉視如毛百年王謝  
丘墟了惟卞將軍墓最高詳見冶城樓忠孝亭忠烈

### 廟

### 謝安墓在城南九里梅嶺崗

考證漢晉紀事云謝安墓前惟立一白碑當時謂難  
述其功德耳按南史齊豫章文憲王蕭嶷薨郡吏南  
陽樂鵠與右率沈約書請為碑文荅曰郭有道漢末  
之匹夫非蔡伯喈不足以耦三絕謝安石貴族之台

輔時無麗藻迄乃有碑無文蓋謂此也安墓舊在城

南梅崗

南唐書云梅頤崗相接處即謝安墓

野亭馬公

之純詩中興江左百餘年人物誰如太傅賢桓賊尋  
常思問鼎符秦百萬已臨邊筴談解折姦雄銳指顧  
能摧敵陣堅平昔經綸  
試此依依費恨向重泉

王祥墓在城西南八十里化城寺之北有斷碑

衛玠墓在新亭東去城一十里

考證玠字叔寶河東安邑人以天下大亂遂扶老母  
將家南行至豫章以王敦非純臣而不久留來向建

業京師人士聞其姿容觀者如堵卒年二十七葬新亭東今在縣南十里時人謂看殺衛玠

顏含墓右光祿大夫西平靖侯顏府君墓靖安道旁

考證晉顏含乃唐時真卿十四世祖也得古碑于靖安道旁乃李闡及顏延之文墓不知所在君諱含字弘都琅邪臨沂人春秋以降戰國以前賢智比肩備千載策昭穆次序上至顏斂漢末喪亂舊譜淪亡自青州使君以上不復詳具祖欽給事貞侯父默汝陰

太守學素相承有聲邦黨君幼稟貞粹長而好古睦  
親之譽發于羈貫每讀書見孝友通靈之事輒悽然  
改容以為人神相與何遠之有但患人心澆偽自絕  
于神耳苟能無以偽雜真神其捨諸修已立誠盡歡  
就養訓行閨門義達州里久要心許之信夷險不與  
正冠納履之嫌終始不蹈兄畿患亡更生君棄絕人  
事蓬首屏氣以就吟養者十有三年次  
闕一繁欽孫  
老而失明合藥須髯蛇膽有青衣童子持裏授君出

戶化成青鳥飛去本州辟不就鎮東琅邪王叅軍事  
過江累遷東閣祭酒朝議謂君正性端素學行通深  
有命太子中庶子轉黃門侍郎本州大中正封回車  
縣侯轉侍中吳郡太守事停還除侍中國子祭酒加  
散騎常侍光祿勳以年遜位就加右光祿大夫門施  
行馬特賜牀帳被褥四時致膳固辭不受馮懷欲為  
王導降禮君不從曰王公雖重故是吾家阿龍君是  
王親丈人故呼王小字王處明君之外弟為子允之



求君女婚桓溫君夫人從甥也求君小女婚君竝不  
許曰吾與茂倫于江上相得言及知舊收淚叙情茂  
倫曰唯當結一婚姻耳吾豈忘此言溫負氣好名若  
其大成傾危之道若其闕敗也罪及姻黨爾家書生  
為門世無富貴終不為汝樹禍自今仕宦不可過二  
千石闕婚嫁不須貪世位家時議者以君審裁將以  
應軍司之選君遽告蔡謨曰此非輕弱所宜尸泰羯  
逆方熾當保國養民以俟事會想愛人以禮宜寢此

言王相聞之卒不授督統之任謨秉君此言終不唱  
討賊之計在朝正立不昵權豪及致仕還居長子髦  
解職視膳中子護躬率田桑中外莫不取給闔門靜  
軌廿餘年九十三薨遺命素棺薄斂吉凶官飾一無  
施列天子嗟悼詔賜墓田謚曰靖侯禮也停柩在殯  
鄰家失火三子抱柩號惶分同灰燼灰爛垂及欵然  
頓滅論曰君平生素行既感達幽靈終殯在堂又獲  
福異豈神祇保佑以顯淳德乎聞託姻顏氏頗識舊

聞與君二子髦約採集言行而著此傳銘曰嵎夷導  
日岱方禋春星離望合水別浸鄰少陽畜德蒼祗效  
神孕僊宇睟誕智息仁洙上道輿綬下儒淵乃昔宗  
林傾席曜筵升門取儔接室稱賢闔則遯哀駁亦抗  
宣曠彼琅邪寔惟海宇憬屬之眾邪臨朝儻載濟越  
師大淹秦旅誰其來遷時聞遠祖青州隱秀爰始貞  
居內辭鼎府外康邦閭建節中平分竹黃初刑清齊  
右政偃營區葛嶧明懿平陽聰理或薦公庭或登宰

士列美霸朝雙風千里華萼之茂於昭不已博士淵  
退再逡儒躬貞子七穆比世稱盛無忝汝陰有偉安  
定舍人攷敏亦元儲命靖侯潛德信豈在明言則側  
幽歎寔聳靈仁親之寶大孝之榮官必凝績學乃敦  
經隨難蕃霸持安闥掖扶元陟帝翼成復辟忌滿裁  
婚鑒冲貶石望年靜駕樂恬延厯三祖連光衆門稟  
教于時列孝克端殊掾潔景衡陰湮心理與任不窮  
秩是謂高蹈山曾木

闕一

胃積芳深永惟世

少一

思樹辭

林碑表有毀策素匪任誦靈墳阿長寄風音晉江夏  
李闡字弘模傳曾孫宋金紫光祿大夫贈特進延之  
字延年銘大厯七年歲次壬子夏四月甲寅十四代  
孫唐金紫光祿大夫前行撫州刺史上柱國魯郡開  
國公真卿書重建于舊龜趺上

史萬壽墓在漂陽縣東北三十五里

考證晉書萬壽為安南將軍蔡州刺史

史爽墓在漂陽縣東北十五里

考證晉書史爽為冠軍將軍

馬訓墓在漂陽縣東北三十里

舊志

考證晉書訓為南海太守

呂游墓在漂陽縣東北五十里

舊志

考證晉書游為尚書起居郎廬陵太守

史光墓在漂陽縣東南四十里

考證晉書光為中書侍郎

史憲墓在漂陽縣東北五十里

考證晉書憲為尚書山陰侯 史疑撰神道碑云伊  
昔有熊道德資始名列五帝澤流千祀文捨伯邑武  
興太史官有世功春秋所紀衛尉疇嗣孝成以康將  
軍樹績光武其昌事列盟府功書太常源分陸海派  
別三江懿彼侍中飛纓殿內為王之伯熙帝之載左  
貂右蟬切問近對八舍攸履七車不昧散騎帝友朝  
夕進規奉輿肅事贊道攸宜有濟之論兼濬之儀獻  
替之美復在于斯桓桓積石允文允武外擅爪牙內

為心膂氣逸南仲才高名虎作師之貞爰擅其旅豫  
章太守人之領袖如玉之貞如松之茂共理天下實  
資時秀良二千石抑非虛授惟君挺生材術縱橫黃  
裳元吉白膏永貞荆巖植潤漢水騰明是謂家寶膺  
茲國楨英英學藝為郎滿歲紫帳趨榮青纁沐惠王  
譚練習鄭泰才計持寔有章大猷無替悠悠廣熙南  
海之湄言典斯郡遠于將之變其風俗鎮以宣慈人  
斯攸賴更不忍欺列郡之政茲焉為盛開國承家大



君有命山川光錫圭組輝映是曰懋功往哉惟敬重  
此名望期諸棟隆初欣鄭鹿奄歎虞鴻麟傷孔子馬  
思滕公死而可作善始令終言式其墓岬山之路如  
斧載形廣輪為度委鬱松楸蒼茫草露萬古同悲千  
春罷曙猗歟雲仍世豈乏賢不忘其本願述其先陸  
家茂德潘氏流泉少一聲懿缺日月俱懸唐景龍四年  
所作其碑字  
多磨  
滅

史稚墓在漂陽縣東六十里

考證晉書雅為散騎常侍

史輝墓在漂陽縣東六十里

考證晉書輝為積石將軍

呂貞墓在漂陽縣東北五十里

考證晉書貞為安西將軍南蔡州刺史

周琛墓在漂陽縣西南三十里

考證晉書琛為遂安太守

紀瞻墓在句容縣東南二十五里

舊府志云在縣一里  
縣志云在東南一十

五里府遠而縣  
近今從縣志

考證晉書穆侯諱瞻有宅在烏衣巷今有古碑在縣  
圃易并堂碑字磨滅僅辨其額云晉故僕射散騎常  
侍大將軍開府儀同三司紀穆侯之銘後有胡克充  
跋未詳何代人字漫不可辨 知縣山陽真元弼題  
云紀思遠之碑自東晉明帝時逮今元豐癸亥歲僅  
千餘年可謂遠也已然風霜剝裂字皆漫滅惟題額  
存焉石亦斷而為二僵仆于道旁幾為農夫野老所

壞故置之縣宇之東軒屋壁間蓋以其古物可貴爾  
後之好事者願常護之勿使毀也 知縣邦城張侶  
題云元豐癸亥邑令山陽真公元弼取紀穆侯碑陷  
東軒壁間且識歲月後百三十四年寶慶丙戌邦城  
張侶得之邑後圃榛棘中拂塵而觀題額尚存因誦  
古物可貴護使勿毀之語益信前輩所謂風霜湮淪  
磨滅散弃于山崖虛莽未嘗收拾良可惜也初明帝  
引穆侯于廣室論社稷之臣屈指君使其一班班史

冊觀此則銘章頌美又下一等遂買石作趺移置于  
易并堂左

宋謝濤墓在上元縣土山

考證淨名寺得古碑云宋散騎常侍謝濤元嘉十七  
年葬于揚州丹陽郡建康縣東鄉土山里

王夫人墓在土山

考證大明七年夫人琅邪王氏合祔于土山里謝濤  
之墓有古碑可考夫人之祖曰獻之父曰靜之

冥漠君墓在東崗

考證宋書元嘉七年彭城王義康修東府城城塹中  
得石塚為之改葬東崗使法曹參軍謝惠連為文祭

以豚酒不知其名字遠近故假為之號曰冥漠君云

元嘉七年九月十四日司徒御屬領直兵令史統作  
城錄事臨漳令亭侯朱林具豚醪之祭敬薦冥漠君  
之靈忝摠徒旅板築是司窮泉為溼聚壤成基一柳  
既舁雙棺在茲捨畚悽愴縱鉦連而蜀靈已毀塗車  
既摧九筵糜腐俎豆傾低盤或梅李盍或醢醢蔗傳  
餘節爪表遺犀追維夫子生自何代曜質幾年潛靈  
幾載為壽為天寧顯寧晦銘誌堙滅姓字不傳號冥  
漠君永垂千年馬公之純詩經營東府漫紛紛掘

土城壕得古墳但見雙棺垂欲朽不知何世了無聞  
遂令移殯東岡上仍與驛為冥漠君萬事到頭成幻  
滅祭時猶讀惠連文虞部楊公脩詩柴壘牢壕見  
古墳元嘉東府惠連文可憐名字知音少祇使雙棺

萬古  
聞

宋宗慤母鄭夫人墓在秣陵

考證皇祐中金陵發一墓有石志乃宋宗慤母夫人  
墓有誌無銘不著書撰人名氏其後云謹牒子孫男  
女名位婚嫁如左蓋一時之制也按慤本傳與此志  
歷官終始不同傳云孝武即位以慤為左將軍累遷

豫州刺史監五州諸軍事討竟陵王誕入為左衛將軍廢帝即位為寧蠻校尉雍州刺史卒此誌乃大明六年作云為左衛將軍監交廣二州湘州之始興冠軍將軍平越中郎將廣州刺史始遷豫州刺史監五州軍事又為散騎常侍左衛將軍領太子中庶子荊州大中正而傳皆略之慙南陽涅陽人而此誌云涅陽縣都鄉安眾里人又云宓于秣陵縣都鄉石泉里都鄉之制前史不載



謝惠連墓在上元縣本業寺相近

考證唐保大中里人孫熹等嘗建碑

南譙張晉孫詩  
幾年夢草句難

成一日春風草又生來謁荒  
墳空展轉卜唐幸有謝公名

齊巴東公墓在棲霞寺側有墓碑字皆不可辨其額云  
齊故侍中尚書令丞相巴東獻武公之碑

齊海陵王墓在金陵

考證夢溪筆談曰慶厯中予在金陵有甕人以方石  
鎮肉視之若有鐫刻取石洗濯乃齊海陵王墓誌謝

眺撰并書其字畫如鍾繇可愛予携之十餘年文思  
副使夏元昭借去託以墜水

齊王孝恭墓在溧陽縣東南二十八里

考證齊史孝恭為散騎常侍

梁始興王墓去城三十里

考證南史梁始興王蕭憺謚曰忠武墓在清風鄉黃  
城村有石麒麟四及神道碑云梁故侍中司徒驃騎  
將軍始興忠武王之碑

安成王墓去城三十八里

考證梁安成王蕭秀字彥達謚曰康墓在清風鄉甘家巷有石麒麟二石柱一神道碑二題云梁故散騎常侍司空安成康王之神道又南史云佐史夏侯亶等表立墓碑誌王僧孺陸倕劉孝綽裴子野各製其文欲擇用之而咸稱寔錄遂並建于墓今存者二其一已磨滅其一字畫間有可辨乃孝綽文也

臨川王墓去城三十里

考證南史臨川王蕭宏字宣達謚曰靖惠其墓在北  
城鄉有石柱碑二題云梁故使黃鉞侍中大將軍揚  
州牧臨川靖惠王之神道

吳平忠侯墓去城三十五里

考證南史梁吳平忠侯蕭景字子照謚曰忠墓在清  
風鄉花林村之北有石麒麟二石柱一題云梁故侍  
中中撫將軍開府儀同三司吳平忠侯蕭公之神道  
建安侯墓去城三十五里

考證南史建安侯蕭正立謚曰敏其墓在淳化鎮西  
宋野石柱塘有石柱二題云梁故侍中左衛將軍建  
安敏侯之神道

南康簡王續墓在句容縣西北二十五里

范府君墓梁招遠將軍臨川王國侍郎范府君墓在漂  
陽縣東北五十里

史府君墓梁散騎常侍兗州刺史史府君墓在溧陽縣  
東北五十里

舊志

周洪正墓在上元縣東三十五里

考證梁元帝平侯景于江陵嗣位洪正諫帝不納江陵果陷洪正兄弟遁歸金陵大同末洪正嘗因著占謂弟曰國家危在數年間吾與汝等不知何處逃形及帝納景又曰禍至矣

陳王僧辯墓在方山下

考證僧辯為陳霸先所害父子七人束以葦席同瘞一穴宣帝天嘉中故吏衛御許亨抗表請以家財造

墓葬之

唐顏尚書塚在縣東來蘇鄉後顏村石龜尚存淳熙十一年顏運使度重建祠堂

考證寔齋王公遂因閱縣志見所載來蘇顏墓屬邑士高元龜訪求遺踪所在得尚書墓隧于荆榛間隧門龜趺儼然如舊顏氏子孫之居是鄉者出淳熙年間江東計使顏公度蠲租故籍以白元龜好義者也因屋墓前而祠之寔齋感慨忠義援筆作記推原魯

公從容就死之志其目有四繼得魯公集讀之乃知  
魯公之墓寔在長安今來蘇之墓尚書墓而非魯公  
墓也按魯公所撰靖侯舍太宗碑則知自舍以下七  
葉皆葬金陵就七葉中言之如延之之子曰竣曰奐  
蓋魯公八世從祖皆嘗歷位尚書則來蘇所謂顏尚  
書墓者豈其人耶

許司徒墓在句容縣東白土奉聖寺側今寺中有捨寺  
基碑見存



史仲謨墓唐越王府東閣祭酒史仲謨墓在溧陽縣東北三十里西山之前賈曾為之碑

史務滋墓在溧陽縣東北三十五里

考證務滋仕唐通議大夫守納言詳見古今人表

劉府君墓在溧水縣北三十五里

考證唐文藝傳劉太真宣城人善屬文師蘭陵蕭穎士為信州刺史卒葬于此

李順公墓在金陵鄉七里鋪去城十二里

考證公名金金字德鏐有神道碑題云唐故開府儀同三司檢校太尉兼侍中贈中書令李順公神道

張懿公墓在金陵鄉石頭城後去城一十里

考證公名君詠字德之有神道碑題云大唐順天翼運功臣特進守太子太傅上柱國清河郡開國公張懿公神道

高越墓在棲霞寺舊門外北山之麓去城四十五里有石題云侍郎高府君墓南唐人也

韓熙載墓在梅顧崗

考證熙載病卒後主謂近臣曰吾竟不得熙載為相  
乃追贈平章事謚文靖葬于此

荆將軍墓在溧水縣南四十五里因羊左事始知有荆  
將軍墓

盧循道王師乾墓在句容縣東一十里

葛府墓西平將軍杜陵侯葛府墓在句容縣西七里

碑

雙女墳在溧水縣南一百一十里

考證雙女墳記曰有雞林人崔致遠者唐乾符中補溧水尉嘗憇于招賢館前有塚號曰雙女墳詢其事迹莫有知者因為詩以弔之是夜感二女至稱謝曰兒本宣城郡開化縣馬陽鄉張氏二女少親筆硯長負才情不意為父母匹于鹽商小豎以此憤恚而終天寶六年同葬于此宴語至曉而別

元懿太子攢宮

高宗皇帝建炎元年五月十三日申時生太子三年  
車駕在建康行宮太子得疾未瘳有金香鼎置于地  
宮人誤觸之仆地有聲太子應時驚搐不止上命斬  
宮人于廡下少頃太子薨寔七月十二日也攢于府  
城內西冶城後鐵塔正覺寺法堂西偏小室中紹興  
元年二月二十九日三省同奉聖旨給降度牒一十  
道付建康府專一應副修葺月輪軍首兵級防護本  
地分官旬具平安狀申府春秋差官祭享

楊忠襄墓在南門外

考證建炎元年江寧府禁卒周德叛漂陽縣卒起應之楊公邦又為宰諭止之不聽乃設方略圍捕殺之且檄隣邑共入討賊賊以故不得逞卒就擒事聞于朝遷本府通判三年十一月金犯建康官吏皆降敵邦又獨不從罵敵人口不絕寧作趙氏鬼不作它邦臣敵剖其心以死

詳見表及傳

紹興中游公九言作墓道

碑慶元初趙師晨立石

碑云所貴乎大丈夫者為其有恥心也孰不好生而畏死

寧死弗顧者為其所以自立于天地間有重于生故也如其不耻則大丈夫不足為難而名義不重矣建炎已酉金人寇江駐軍采石先是車駕幸越杜充以宰相總諸道兵鎮江左前執政李昉供饗事顯謨閣待制陳邦光守建康充懦不能戰以軍六萬人列江岸乃閉壁莫敢出敵諜知遂渡江我師自潰充與麾下數十降敵北去敵入建康稅先降邦光欲棄城度不能遁亦降遁判楊公邦人獨不從大書其衣裾曰寧作趙氏鬼不為它邦臣授其僕曰持此以見志吾死矣稅邦光慚謝猶強擁公上馬即野次俱見敵帥四太子者命之拜公叱曰我不降何拜敵莫敢逼縱歸明日遣其將張太師諭公授以舊官公以首觸階陸求死金人驚止之徐曰公所守固高然勢去矣第歸審思之明日復來公亟移書其將曰世豈有不畏死而可利動者幸速殺我又明日四太子觴二降人于堂上樂作召公立庭下公注視稅邦光曰天子以

若杆城賊至不能抗又不守節更與共燕樂尚有面  
目見我乎敵取紙書死活二字謂曰無多言即欲死  
書死字下則顧旁吏有簪筆者躍起奪而書曰死于  
是敵皆動色又使引去明日再以見公遙望四太子  
遂大罵極口醜詆呼天言天寧久假汝行磔萬段尚  
安得污我敵怒使人疾擊梃交下公罵不絕口見殷  
剖腹取其心明年敵去州以事上聞詔贈直秘閣官  
其子二人即死旁為墓立廟賜謚忠襄九言嘗謂節  
義者國家之元氣也人無元氣則死國無節義則亡  
朝廷有仇直之風則遇變多仗節之士大丈夫臨難  
不可免遂以身死之所以立君臣之義明逆順之理  
使任人之事者曉然知廢義背理決不可以立乎天  
地之間其有功于名教也大矣嗚呼我國家涵養二  
百年自熙豐一壞蔓延以至政宣變起倉猝當時京  
師不屈僅得數人而繼之者公也使靖康之難一時  
在位人人如數公金人安得談笑而移城闕又使靖



康之難無公等數人南渡何以中興然則有國家者  
平時獎崇正直扶持人心其可忽乎以建康論之杜  
充輩皆宰執侍從相倡降賊公以州佐貳乃挺然若  
此則官職又可輕予乎儻朝廷以充之柄授公之手  
城未必遽陷今既敗事在公報國之義固已無負而  
朝廷所失何如哉此又為古今忠義之士所深嘆也  
公吉州人政和乙未進士後為辭曰山雲起兮陰  
為吏金陵再拜墓道嗟嘆而為辭曰山雲起兮陰  
木蕭風兮蕭森骨荒榛兮頽隧野鳥怨兮清音噫丙  
午兮燕安謁薦紳兮多盤繫苞桑兮弗戒論舊好兮  
開邊釁生兮召戎傾天地方塵蒙繁承平兮百載莽  
夷門兮廟宮我踰邠兮梁山蛇游食兮江干擁貔貅  
兮首鼠紛推拜兮後先獨立兮慨陳人自靖兮此身  
寧為鬼兮趙氏肯涅緇兮金庭有醑飼兮苟哺弗自  
知兮貌頽尸坐兮麟兮拜強敵曾莫嗔兮喪心豈曰余  
兮獨死汝握玉麟兮偷生振英聲兮堦下氣烈動兮清

寧凜名義兮身世九鼎重兮一羽輕  
翳翳兮幽藏類陽照兮山荒髮毛爪齒兮  
一世同腐廟貌圭象兮千古之光春秋兮  
代謝勿替兮丞嘗慶元戊午春修職郎  
建康司戶參軍趙師農立石

### 王舒王墓在半山寺後

翰林給事張唐公墓在上元縣長寧鄉呂惠卿作誌

資政管元善墓在句容縣下蜀鎮柔信鄉之原

白時中撰誌銘

銘曰管以國氏世遠而分龍泉著姓  
自公有聞公安粹秀渾然德器種學

績文川流岳峙暨于從政激濁揚清有施有守偉其  
休聲濟是顯融持橐珥筆獻替絲綸左右密勿出殿  
方面入濟廟堂謀猷來告愍恤百章惟其令名詔于  
後裔勒茲堅珉幽宮永閔

楊忠介墓在上元縣鍾山鄉

考證楊宗閔字景齊代州崞縣人太傅和義郡王存中之父也屢立戰功建炎元年十二月金人犯永興衆以永興無備勸宗閔去宗閔曰吾結髮從戎蒙國厚恩行年六十有七唯有死耳他非所知明年正月城陷血戰而死贈太師魏國公謚忠介其子存中招魂葬于鍾山敷文閣待制劉一正爲之銘

楊爲顯姓世澤以滋

由漢及唐別派分支公家鴈門奕奕有聞儒學相授位微德尊公曰大夫志尚各異我必以功自見于世

惟時夏童跳梁干紀躡我西陲幾無寧歲公初即戎  
氣已益衆雙帶兩鞬射則命中鏖戰疆場蹂踐斥鹵  
固敵是求計不返顧公身居先將士內激凡師所臨  
當百以一料敵制勝不愧古人機變橫出捷若鬼神  
晚佐永興遭時藉虞連城不守援絕勢孤人或謂公  
子盍去諸公曰國恩必報以軀帝為嗟悼告弟䟽榮  
孰慰忠魂公有存孫存孫翼翼位在九棘勲名孔昭  
恭懼靡忒光大厥家未見窮已天其賚公孫又有子  
葉狀元墓在上元縣宣義鄉

考證葉祖洽字惇禮熙寧三年廷對第一官至徽猷  
閣直學士太中大夫政和七年四月六日終于真州  
寓舍詔賜賻加等贈宣奉大夫郡具葬事以九年正

月二十五日合葬于江寧府上元縣宣義鄉鴈門原

夫人之墓上官均撰誌銘

銘曰惟士狃常文弱而弊慕組葩華寢失根柢神宗

獨運以古為制章明六經策以經濟惟公褻然眇視儕類放詞汪洋克當帝意聲名偉如多士嗟喟峻陟

蓬山炳煥即位出殿侯方入聯近侍天官之宗權衡百吏帝咨其人惟公之試有謀必陳有作必遂峙立

孤騫邪傾弗倚俗方喜同公則弗隨衆為遜恭公以簡持安于譽誹自信不疑投閒綴書研道之微尚期

奮飛為國之毗孰云其亡士友嗟歛年豈不多大位克躋有鬱其中不究其施勒銘幽宮以永其垂

太師秦檜墓在牛首山去城十八里

大資秦梓墓在漂陽縣南屏風山

少保威定王德墓在上元縣鍾山之原

傳零撰神道碑

銘曰赫赫炎宋中興丕基蕩攘蛇豕以及鯨鯢公自熙河提戈崛起感會

風雲鷹揚萬里靖康之初手擒黠寇大振天聲名聞聖主宮虎跳梁震驚漢沔戎略一施二逆就縛昱亦擁衆盜據濟上親梟其首風威遠暢成挾強援颺張淮蔡公談笑間星奔獸駭遇冠江夏鋒如蜚芒轉戰千里敗之池陽淮海震擾大駕南巡招懷降附獨成一軍急趨東吳觀靖國難賊壓和壘民墜塗炭求援于公乃麾備將昱彥授首軍容益壯傳等造變以逞異圖公奮袂起期于誅鉏逆臣既擒天子復辟乾維再張公與有力繼聞代馬南渡武昌卷甲而趨直扼其吭敵進無所其退惟艱勢益窮威歛軍北還公奏凱旅將迎隆祐未達賴上命誅妖寇嘯聚貴溪曰王念經陪竊大號恃險憑陵師涉彭蠡江等遊魂嬰公

之鋒如火燎原尋歷鄱陽鄱陽危急文舜猖狂矢石  
四集公冒重圍敵人視魄指頤之頃兇渠盡獲爰乘  
兩勢擣念經壘枹鼓一鳴巢傾卯毀控扼天塹屏蔽  
京口羣議退保公請死守仲威時衆翺翔揚土公手  
擒之不煩一旅青蹂江壩公乃拔劍破之崇明遏其  
虎敵琳劫其衆歸身逆徒不容旋踵磔死當塗逆雖  
推麟悉衆泚水公往驅之曾不折筭應援西潁公方  
整旆羣寇謀知望風奔潰就繫斬邑虎踞宿城耶律  
面縛一塵不驚敵人精甲踰十萬衆長驅江潁獨與  
我並於時分兵將保江東公請先登以折其衝獨麾  
虎旅夜涉采石父子捐軀誓死于敵賊陳柘臯旌麾  
塞空公親合圍首挫其鋒繫公之勝衆方堵進名王  
貴酋殲夷殆盡由茲一戰敵勢大摧不敢南鄉飲馬  
長淮惟敵之來其勢桀驁視公凜然乞盟請好躋時  
承平疆場肅靖舍爵策勲節旄是命當宁憫公久膺  
煩劇聽解軍務俾就安適聖恩隆厚其誰公如總符

江陵雍容甚都卧鎮上游控制荆楚忽焉淪喪失茲  
名虎訃聞西來上心震悼昭示眷懷錫之渙號蘭砌  
芬芳勲庸益著高大其門紹隆厥緒有  
宋功臣翊戴皇極用詔後昆刻諸金石

忠壯李節使墓在溧陽縣西北青龍山之南

考證邈字彥思臨江軍人靖康元年八月詔以邈知  
真定府事邈至守備單弱金人入寇已未兵薄城下  
辛酉敵圍城邈率其麾下且戰且守而援兵不至十  
月戊戌城陷邈巷戰不克將赴井死左右持不得入  
斡里雅布脅邈拜不拜以火燎其須眉及兩髀亦不顧



因問邈團境內民使擊我謂我為賊何也邈曰汝負盟所至掠吾金帛子女非賊而何卒不能屈乃拘于燕山府久之欲以邈知滄州笑不荅且說之曰天下彊弱安有常吾中國適逢其隙爾汝不以此時歸二聖及兩河地歲取重幣如契丹以為長利彊尚可恃乎敵聽其言命邈祝髮左衽邈憤詆拒甚力乃以槓擊邈口流血邈復吮血嚙之翌日自去其髮為浮屠敵于是大怒遂擊邈死時建炎二年也紹興二年招

魂葬此葉叅政夢得為之銘官至青州觀察使真定府路安撫使贈昭化軍節度使謚忠壯

四廂王節使墓在上元縣鍾山鄉棠梨山

考證王瑋字君瑞隴西成紀人紹興中屢立戰功官至四廂都指揮使贈節度使陸敦臣撰誌銘碑字斷缺

贈節度使盛新墓在上元縣宣義鄉武岡山

考證墓記略云盛新亳州人以勦賊功賜承節郎後因金兵犯境結忠義三千人隨張俊護駕南渡

轉官至武功大夫差充建康府中軍統制次差充太  
平州采石鎮水軍統制紹興辛巳金主親率兵入寇  
屯兵和州謀自采石渡江時都統制王權往建康府  
稟議軍事存留張提舉謂軍一行事務官遊奕軍張  
統制在石跋岸備禦見金主于臺上親麾紅旗進發  
人船自北岸徑行衝突南岸盛新賈勇將士以海鯨  
船一十隻進先破敵敵船覆溺楊林岸下時中書虞  
舍人因宣諭江上至采石登山觀戰陣發使收兵  
保守南岸中發報捷新蒙恩加官至中亮大夫正任  
濠州團練使淳熙二年追錄前勞特贈福州觀察使  
繼贈昭慶軍節度使

待制錢端修墓在溧陽縣南上壩村

考證端修諱時敏溧陽人擢政和二年上舍第紹興

初監修行宮官至中大夫敷文閣待制李公處全誌

其墓

苗傳劉正彥之變呂忠穆公頤浩以簽書樞密鎮金陵謀帥師勤王公時為修行宮官屬力贊

之預草請復辟表置懷中一日出以告忠穆公曰艱危如此公以見執政處方面討叛職也勿居它人後忠穆聳然即日提兵趨行在所表語有田太母以柔靜之身高居嚴邃皇帝以幼冲之質淵默臨朝陞簾之閒天地相隔萬一羽書交至變故乘時則迫切之虞可勝道哉惟念神器之大祖業之重不憚再四請復明辟親攬萬幾以安衆心然後思致冠之由奮撥亂之略據東南形勝以圖西北期以歲月中興不難致矣張魏公浚時以防遏使留平江同勤王之舉得表俾謄本傳四方讀者增氣發運副使呂源覽之泣下曰國有人焉可無憂矣公獨以不獲執鞭弭從諸軍周旋為恨及事平諸司表賀往往多出公手公始

入朝見大臣于政事堂首言今軍旅方興戎幕所辟  
置要須智謀策略之士否則仗節死義之人今蜀僚  
幕中非奔競無恥奴事諸將為求官射利之計則陰  
負咎累絕進取望者苟祿自私傲倖文飾而已至于  
倉卒見敵欲決疑定議則托儒為姦緣飾前代欺惑  
主將惟務退縮自為身謀國家何賴焉乞悉從堂選  
以革前弊切中  
時病識者韙之

龍學錢元英墓在漂陽縣燕山之原

考證元英諱周材漂陽縣人鄉舉第一登建炎二年

進士第嘗為孝廟潛邸舊僚再掌內外制官至龍圖

閣學士尤公袞撰誌銘

銘曰堂堂錢公一世之師騰  
寔蜚英自其少時疇不工文

體弱氣萎公以道德養其華麗雅健雄深盤詰奇  
士以之顯器識或卑公所踐履明白坦夷在險弗渝  
在涅弗淄有文有行于政或迷公之應事如燭與龜  
所居可紀所去見思校讐西山珥筆右螭進登掖垣  
遂掌訓詞大冊雄篇星晶日暉常揚燕許厥問四馳  
帝在初潛公始受知執經王府四閱歲暮帝既踐祚  
公方奉祠曰予舊學其亟來歸公來自西天子曰嘻  
久不見卿乃今未衰勸講華光旋陟瑣闥從容謂公  
卿當輔台棘人樂樂俄反故棲再賜之環終以疾辭  
皇揆方深我志弗移遂上印綬如脫馬羈養浩丘園  
左書右詩胄奇陳陳有蓄未施人僕文明天不慙遺  
燕山我我漂水繚之有崇其崗自公兆之懿德清芬  
世其紹之

待制張孝祥墓在上元縣清果寺側

考證張孝祥字安國舉進士第一官至顯謨閣學士

本歷陽人未第時多留建康隆興中嘗為留守後葬

于此

乾道六年三月郡人朱曠拜墓下留詩瘦馬踏亂山盤折度村塢處處花柳明耕鋤偏壠畝麥

苗見膚寸拳扁方出土乃知去歲旱布種坐遲暮夏租競如何未免催迫苦後鞭扣蕭寺來謁張公墓再

畔拭淚行疇昔感知遇盛年厭紛華騎鯨上天去校讐三洞章飛仙自儔侶笑唾人間世一品競何補世

人患死生未究死生故是性本不滅來往若寒暑休笑勿復言僧憲睡春雨紹熙庚戌中秋後三日門

人武陵黃道輔拜墓下留詩曉出白下門瘦馬踏秋色鍾山度蒼翠慰我遠遊客暮投清果寺花草獻幽

寂長廊靜無人落日照西壁平生張于湖萬里去一息翩然九州外汗漫誇鯨脊乾坤能幾時安用較顏

跖文章失津梁所念斯道厄夜闌取不寐搔首聽蕭  
瑟懷人感西風翁仲守孤柏上元縣尉掾闕名拜  
墓下留詩古塚誰來香一瓣斷蓬衰草日  
斜陽至今唯有文章骨埋入幽泉土也香

張防禦保墓在江寧縣鳳臺鄉松林莊之原

考證保字和叔太師循王俊之母弟也佐兄立功累  
官至拱衛大夫榮州防禦使留建康十五年紹興二

十六年七月終于私第年六十六

銘曰黃帝子揮始  
制弓矢以功賜姓

命張為氏自仲存友世不乏賢猗歟循王克享其全  
公以母弟實侍戎陳攻堅擊強屢犯鋒刃帝曰予嘉  
好爵汝縻八遷橫列震耀一時歸自拓臯約成偃武  
循王入覲留長西府公始脫胄領祠赤城時屯建業



皆循王兵公居其間思所以處曰余伯氏為國心膂  
予敢沽譽以感衆情予敢實勇以憂吾兄廼屏故習  
沉默間靜晦智與能不與世競十有五年跡不涉疑  
循王之忠天下益知防遏真拜戎律貳總天與善人  
意公且用鴈序忽盡公亦何心憂能傷人一夕  
古今長干之原循王所卜公其寧居貽子孫福

趙節使彥墓在上元縣金陵鄉祁家山之原

考證彥字公美本祁之深澤人御前水軍統制純之  
父也初隸呂剛中戲下建炎初剗臂納密書間道走  
謁高宗皇帝于相州遂扈駕駐吳會勤王平寇屢立  
奇功最後以柘臯功進七等乾道九年十一月卒于

建康贈昭慶軍節度使

趙總管士盱墓在句容縣政仁鄉慈恩寺

考證墓誌云

士盱字岩老太宗皇帝第八子周恭肅王之四世孫也靖康丙午八月生于睦

親宅丁未之變公在襁褓養于乳母李氏李適梅氏相與保毓甚謹晦其姓氏紹興己未敵請和公始得同親王居廢來歸年已十四矣追念父母泯迹朔荒嗚咽流涕殆不能生聰敏長厚以近屬賜名授官及冠奉衡山祠祿于金陵攬形勢之雄壯歎中州之榛蕪謂茲土裏江表淮王炆所聚且距河南地近恢復之本當道于此指日疆土還職方之舊則歸父母邦不遠矣故樂與軍帥游譚兵家事以資異嘗執戈衛社計于焉謀居益有待爾始則卜築南郭外咫尺城闔且有清勝之趣卿貴大夫慕公高潔競與論交車

轍聞門殆無虛日公雖天性節儉然雅好賓客有解貂換酒之風居既安不事榮進朝廷嘗以公行尊屬近欲命襲爵主禩公聞之異謝甚力時議高之故凡奉祠者六食貧外監征文祿者三而公處之裕如淳熙辛丑有以公之節行升聞上深嘉歎特命進秩積階至武經大夫

崔中書墓在溧陽縣南泉山

諱敦詩

李戶部墓在溧陽縣北下湯之原

諱朝正

董侍郎墓在溧陽縣北前馬里

諱平

李侍御墓在溧陽縣西南大石山

諱處全

魏參政墓在溧水縣

諱良臣

王宗丞墓在溧水縣

諱瑞朝

程孫墓在清涼寺後山之麓蓋明道先生程純公  
五世孫也諱偃孫本伊川先生五世孫寓居池  
州周應合為明道書院山長日請於帥府將求  
伊川之後人教養選擇以繼明道之後裕齋馬  
公移文池州尋訪太守定齋陳公謀之闔族參  
之公舉禮送偃孫來應茲選

江東撫幹兼明道書院山長周應合

申照會書院為明道先生程純公立也固將有以壽其道脉亦當思所以壽其家脉今純公之

後所至未見其人而伊川先生正公之子孫在池陽  
為稍眾擬欲從間府行下池州委請通判教授于伊  
川先生子孫中自十五至三十歲遴選其資質可以  
進學者五人並禮送書院養而教之觀其有立別議  
區處庶幾為子孫者崇德象賢足以嗣續先世之舊  
而家脉與道脉俱壽矣更合取自指揮秦鈞判行池  
州回申脩述通直郎新差知興國軍永興縣主管勸  
農公事兼軍正伯陽伯四世嫡長孫程准劄子照得  
明道先生子二人而端懿居長孫四人而昂居長曾  
孫六人其後不復可考准本位伊川先生亦二子四  
孫曾孫八人玄孫十二人仍孫見止十人來孫見止  
四人可以遷繼明道者寔難其選獨節之之子濤濤  
之子偃孫乃伊川一氣之正派可為明道後節之與  
克家為兄弟若空一代而以偃孫為克家之孫于法  
亦通然不可使節之無後也今莫若全以節之一  
位三世為明道先生嫡孫昂命繼節之為明道曾孫

溥為明道立孫偃孫為明道來孫則明道先生之後  
世世有人節之乃伊川長子知宣端中第三子通判  
晟之第五子于通判本位即不相妨雖非禮之正而  
合乎禮之權可以仰稱繼絕之盛德嘗經戶部看詳  
指定伊川先生次子通判第五子節之一位三世移  
州繼純公之後按禮援法實為允當奉聖旨依割付池  
偃孫年方十七自幼而孤以貧失學有母六表無

以為養定齋惻然為具衣冠而資送之既至建康山  
長率堂長以下告于純公命之為五世孫以掌祠事  
請于府月廩四百千米四石以養其母貼占官屋以  
安其居給綿絹以完其衣定課程以勉其學委堂長

胡淳講書程立本任訓導如已子以時察其學之進否專留書院薰陶氣質惟休澣日歸省其母非休日不許出其後張山長顯注意尤篤蓋其監豐儲倉門日嘗納劄廟堂力言此事方冀偃孫之成立以嗣家學而偃孫忽以疾終實景定二年三月也應合適歸自池陽乃與胡山長立本謀具喪斂且請于府偃孫雖死而母無所依仍以偃孫存日所得之餐錢養其母終其身秋八月應合與翁山長泳謀治葬藏得地

于清涼寺後山左右環抱面挹江淮咸曰吉壤委講  
書李朴任其事應合泳率諸士友縞服臨送更議為  
偃孫立繼未得其人姑俟它日

### 義塚

四門義塚八所今為義阡紹興己酉天子大饗明堂詔  
凡敵所破州縣暴骨之未斂者官募僧道收瘞建康守  
臣葉夢得度城四隅高原隙地各為穴以待藏在西門  
清涼寺之南茶山之下者二北門張王廟之西北麟蛇山



之下者二南門官道之西越臺之下者二東門官道之  
北齊安寺之西者二

掩骼記建康承平時民之籍于坊郭以口計者十七  
萬有奇流寓商賈游手往來不與建炎己酉冬敵既  
大八十一月壬戌南渡自溧水徑趣浙留其國太師  
張真努分兵五百薄建康宰相杜充率麾下北去知  
府事陳邦光以城降敵由是未盡肆其虐別築城于  
西南隅以居取城中器械子女金帛儲之禁吾民毋

得出州城明年夏回自浙東五月復至建康與所留  
兵合丙午入城始料其強壯與官吏以兵圍守于州  
之正覺寺散取老弱之遺者悉殺之縱火大掠越三  
日府寺民廬皆盡乃擁衆去凡驅而與俱者十之五  
逃而免者十之一死於鋒鏑敲撈者蓋十之四城中  
頭顱手足相枕藉血流通道傷殘宛轉於煨燼之間  
猶有數月而後絕者官軍繼收復又二年烏鳶所殘  
風雨所蝕阡陌溝渠暴骨皆充斥行者更踐感居者

雜卧起與瓦礫荆莽相半也紹興辛亥天子在會稽  
秋大饗明堂詔凡敵所破州縣暴骨之未斂者官為  
募為傳老道者收瘞累數至二百則得度于是州之  
寺五得其隸業精勤者二十人益以貧民之餓者食  
而佐之度城四隅高原隙地各為穴以待藏出羨穀  
四百斛錢三百萬以給費為籍日校其所獲以時檢  
察之人欣然皆樂效力閱十九日得全體四千六百  
八十有七斷折殘毀不可計以全者又七八萬以次

入于穴而城中之骸略盡十二月甲子遂瘞敵之殘  
酷不道載籍以來未之有也惟天子仁聖將為斯民  
請命于上帝而不得則猶欲及其既腐之餘昔文王  
葬枯骨而天下歸心其葬未必廣也推其所葬以及  
其所不葬而天下如是可以王矣秦穆公越國而伐  
人及其敗也能封其尸君子猶許以霸天生斯民必  
使之生養蕃息以厚其終禍福與奪寔將聽之其曰  
得乎丘民可以為天子殺一不辜雖得天下不為者

名之曰好生之德然則自敵存食中國奪天之所厚而殘之蓋不為量數而吾天子方推其所以好生者一二而收之於後天固享之矣合此億兆無辜之冤則亦必有聞者造物者其忍之乎凡穴深廣皆二丈以其四之三藏骨其一實以土其上封皆高一丈在西門清涼寺之南茶山之下者二北門張王廟之西北麟蛇山之下者二南門官道之西越臺之下者二東門官道之北齊安寺之西者二合八塚督役者兵

馬鈴轄拱衛大夫寧州防禦使張禧都巡檢武翼郎  
王利檢察者安撫大使司準備差遣奉議郎安自求  
迪功郎沈正路工畢以狀上尚書明年二月禮部給  
牒而度者華藏寺五人能仁寺五人保寧寺五人清  
涼寺三人壽寧寺二人

義塚之旁遂為義阡凡軍民皆雜葬焉垣牆弗設牛  
羊踐之土淺骨暴過者顙泚甚失拊卹之初意開慶  
己未馬公光祖再鎮之初惻然動心封其土繚以長

垣在東門者一百五十四丈在南門者一百五十八丈在西門者一百九十八丈五尺在北門者二百八十九丈五尺為門為榜嚴其扃鑰非奠祭不啓委上元江寧兩尉綜其事選隣僧之慈愍勤事者掌之東阡則選之半山寺南阡則選之宋興寺西阡則選之清凉寺北阡則選之永慶寺人各月支錢三十緡米一石

南北義阡係轉運副使真公德秀立

建康府城內外昨於嘉定八年內民間因有死亡之家無力買地埋葬以致棄在溝壑遂踏逐到南北兩門外各有空閑高荒地段置立兩阡差撥僧道專一在各處看管理瘞月支僧道等添給錢米內南義阡見造屋三間于毗近殊勝寺輪差僧一員行者一人在庵專一看守早晚焚修每月本司支錢三貫米一石目今見係僧道明行者濮了茂外有此義阡見係後湖真武廟道士孫守清就行看管每月仍支米一



石 鵲柱牌以江東轉運司新叔南北義阡為名

兩阡並委運管提督 遇有貧乏之家欲於義阡埋

葬僧行等即時放入不得稍有遏阻及乞取錢物如

違許提督廳覺察具申本司追究施行 所置義阡

地段姑據見定地步尚狹未能開展合立定則例每

名只許破一丈庶幾不致多占地段有妨他人安葬

所破葬地既以一丈為準又恐安葬之時廣占尺

寸合行下尉司先將其地以一大界為一眼令深五

尺以防他日墾滅止許於眼界內安葬所有坐向却  
從其便 看管僧道並不許拋離如點檢得不在其  
本月錢米更不支給 所葬人姓第於簿內抄上  
義阡墓地如已遍滿即申本司支錢取掘焚化有子  
孫親屬者令其自行舉化其日隨宜添請僧貲就庵  
脩設功德追薦 葬穴不可太淺庶免他日暴露仰  
僧行告報定要掘深五尺

覆舟山下義塚

端平三年十二月十五日制置使陳尚書韓調兵勦敵江北戰而死者甚衆遂於建康府北門外覆舟山龍光寺側擇地開二大穴甃以灰磚凡陣歿將士骸骨悉收而葬之給牒度二僧以守其塚給田百五十畝有奇以其租入為每月供享忌日追薦之用版

榜寺門

勘會當司昨于建康府城北門外龍光寺側擇地結砌礦口勦敵鏖戰陣歿將士墳塚以

安忠魂除給度牒二道附本寺度僧看管外所合給田與寺中每年脩忌逐月供養尋呈無廳書擬忌辰欲自十二月十五日鏖戰日分逐月供養欲月衙日所定田畝契勘得鍾山鄉婁立中戶絕見在制司收

租計一百五十八畝一角四十步五分與龍光寺附近歲收小麥二十八斛二斗一升米三十四斛五斗六升六合欲全撥此項給據付本寺逐月忌辰之用仍牒建康府劉僧正司板榜本寺照應

### 大使馬公光祖任內脩四義阡

東西南北四義阡各在城外死而無歸者給棺槨殯焉歲久樊牆頽圯牛羊從而牧之暴骨如莽後殯者多發前塚棄枯骼而納新柩光祖雖屢行禁止然網維無人率為具文大使始命上元江寧兩縣簿尉分其責月給十八界二十貫酒四瓶又踏逐寺之去阡

近者東半山西清涼南宋興北永慶分命主僧經理  
營繕繚以脩垣置門啓閉鑰則寺僧掌之月各給十  
八界六貫米一石又慮東義阡之去半山遠也創庵  
三間就寺選僧行各一名守視凡遇殯葬官給土工  
十八界五貫量棺之短長廣狹深穴而厚封立牌標  
記西南北亦如之又於清涼寺西偏得地三十餘畝  
以廣西阡依山為牆自是皆無蹂躪之患凡築牆五  
百八十一丈為庵一為門四共糜錢十八界四千三

百餘貫米七十餘石

景定建康志卷四十三